

25. oktober 2023

UKA2023/131

Inuussutissarsiutigalugu piniarnermut allagartaq maanna atuuttumut taarsiullugu inuussutissarsiutigalugu aalisarnermut allagartap, inuussutissarsiutigalugu piniarnermut allagartap immikkoortilersinnissai pillugit apeqquteqaat aallaavigalugu oqallisissiatut siunnersuut.

(Inatsisartuni ilaasortaq Aqqalu C Jerimiassen, Atassut)

Oqallisissiasatut siunersuuteqartooq inatsisartuni ilaasortaq Aqqalu C Jerimiassen qutsavigaarput imatullu oqaaseqaateqassaagut.

Puigunngisaannagassannik siullerpaamik angunera eqqaamalluarpara, misigissuseq oqaluttuariuminaatsoq taamanikkut misigaara, tassa piniartuunerup ukiorpassuarni inuunitsinnut peqataalluinnarsimanerata kingunerat tassani misigivara, tamannalu inunni immikkuullarissutut eqqaamajuagassama ilagissavaat tamannalu allanittaaq taamatut misigineqartartooq qularinngilluinnarpara.

Siumup imaatigut inuutissarsiorneq aalisarneruppat piniarneruppat tunngaviatigut annertuumik tapersersugarai, tamanna quppernitsinni atuarneqarsinnaasoq piffissaq manna iluatsillugu matumuuna innersuukkusuppara.

Piniartuunerup aqqani ukiut ingerlaneranni piffiit assigiinngitsut eqqarsaatigalugit periarfissiisarnera assigiinngitsunngorsimavoq, ilisimavarput piffinni isorliunerusuni piniartuunermi puisip amia annerusumik tunngaviliisartooq tassami innuttaasut amerlasuutigut amerlanngitsuusarput susassareqatigiinnerlu annertuumik piummat iluminni tuniniaasinnaasarneq killeqarnerujussuaq piosoq nalaattarpaat, tassa pingaartumik qilalukkap mattaa nassiussinissamut periarfissaqartuni piniartunut isertitsiossutaasinnaasoq aningaasarsiornermullu pineqartunut iluaqutaasartooq ilisimalluarlutigu.

Soorunami oqaatigeriikkattut pissutsit qangamut sanilliussinnaanerat allanngorpoq, ilisimavarput piniartuunermiit aalisartuunermut ikaarsaartoqartarsimanera, taamatut pisoqartillugu taakkuusarput piniartut aalisartuunermut illikartartut, taakkuugajuttarpullu kinguaaminnik inuussutissarsiutiminnik ingerlatseqqittartut, taamaasilluni tunngaviatigut piniartup inuutissarsiornera aalisartuunermut nassarneqartarluni.

Piniarnerup aqqissuuteqqinnerani piniarnermut allagartaq piulerpoq, taamaasillunilu piniartooq sunngiffimmilu pinialuttartooq immikkuulerlutik, tamanna tunngaviatigut iluarisimaarparput,

tassami pingaartumik piniakkat killilersukkat pineqartillugit tunngaviatigut piniartut pisassinneqartarnerat piosoq paasinarluinnarpoq.

Ullumikkumut uterutta siusinnerusukkat taariikkattut nunatta angissusersua piffinnik assigiinngitsunik siammasissumillu piniagassat eqqarsaatigalugit periarfissiisarpoq, tassami ilisimavarput piffiit ilaanni piniagassat aalajangersimasut takkusimaartarput, nunattani ilaani takussaasaratik, soorlu qilalukkat, aammalumi tutut assersuutigisinnaavagut.

Aammattaarlu ataqqinartumik piniariaaseq qangaaniilli atugaasoq suli ullumikkut atorneqarpoq, tassa qaannamik qimussimillu piniartarpoq, taamatut ingerlataqartut annertuumik piorsarsimassutsikkut tammattaaliuineramik ingerlatsisut piffissaq manna iluatsillugu ataqqillugit nersorlugillu nasaarfigerusuppavut, taakkuuvusimi siulitta anersaavanik ingerlatseqqisut ataqqinaatersi piujarlitoq.

Aalisartuuneq piniartuunerlu immikkoortinneqassappata piffinnut ilaatigut annertuumik sunniuteqassooq takusinnaavarput, nalunngilarpummi ulluinnarni atukkat eqqarsaatigalugit aalisartut piffissami aalajangersimasumi piniarnermut saattarmata, taamatullu periuseqarneq aamma piniartut aalisarnermik sammisaqarsinnaasarnerat ataqatigiissumik eqaatsumillu ingerlattarmassuk taamatut pissuseqarneq ataqqilluinnarparput allanngortinnissaallu orniginartinnatigu.

Takusinnaavarput taamatut aaqqissuusineq pilissappat tamanna annertoorejummik allaffissornermik pilersitsissasoq, piniarnermik isertitsisinnaaneq piffiit ilaanni piffimmi aalajangersimasuinnarmi piunerusarpoq, taamaasillunilu ukiup ilarujussua aalisarneq sammineqartarluni, tassa aalisarnermik isertitat taakkuusarput annerpaamik isertinneqartartut taamaasillunilu piniarnermut isertitanut sanillersuunneqarsinnasaratik.

Nunarpulli angeqimmat naatsorsuutigineqarsinnaavoq piffiit ilaani piniakkanik tuniniaasarneq annertuumik isaatitsiffiusartoq oqaartigineqarsinnaavoq, pingaartumik illoqarfinni angisuuni tamanna ingerlanneqartoq malunnartarluni, aammalu ilisimavarput piniarnermiik aalisarnermut eqaatsumik illikaplassinnaaneq piosoq inuutissarsiuteqartunut annertuumik iluaqutaalluni taamatut ingerlaaseqarneq naliginnaasutut isigineqartoq, tamanna tunngaviatigut iluarisimaarparput.

Allagartat immikkoortinneqassappata piffiit ilaat piniartuerulluinnassasut takorloorsinnaavarput, taamaasillunilu pingaartumik piniakkanik killilersukkanik piniarsinnaaneq ajornartorujussuangussaaq tamannalu orniginartingilarput.

Maannakkut aaqqissuusineq soorlu Naalakkersuisut akissutaanni aamma iluarisimaarnartutut taaneqartoq, imaani inuutissarsiuteqarneq aallaavigalugu naleqquttutut isigaarput, taamaattumik siunnersuut taamatut isikkoqartillugu tapersingilarput, takusinnaavarpulli qulequtaq pineqartoq siunissami qaqeqqinneqartuartaasooq naatsorsuutigigatsigu, aammalu pissutsinut



naleqqussartuarnissaq pisassasoq naatsorsuutigilluinnaratsigu, kisiannili ullumikumiiingilaq aalisartuuneq piniartuunerlu allagartatigut piniartarneq eqqarsaatigalugu immikkortissallugit aalajangernissaq.

Naggataagut aasaq manna Siumup ataatsimeersuarnerani piniartutoqqap eqqarsaatissiinera oqaatigerusuppara:

Ukiorpassuit imaani inuutissarsiorpunga, aalisartuuneq piniartuunerlu ingerlallugit, kisianni pissusissamisoorsoringilara sooq piniartoq ukiut tamaasa piniartunngortinneqartarnera, tassami piniarnermut allagartaq pissarsiarigutsigu akilerlugulu aatsaat piniartunngoqqittaratta, naak inuunerput tamaat piniartuugluarluta uffalu sulisartoq suliaratoruni suliffittaarluni ukiukkaartumik akiliisanngilaq sulisartuunini uppernarsassallugu, ulloq tamaasa suliarortarpoq sulisartuuneralu piujuartarluni, piniartuussaguilli aatsaat piniarnermut allagartaq akilerukku pissarsiaralugu aatsaat piniarsinnaavutit ukiut tamakkiallugit tamanna utikatsillugu tamannalu naammaginangilaq.

Taamatut oqaaseqarluta oqallisissiatut siunnersuut tapersinngilarput tunngavilersuutigut qulaani pineqartut pissutigalugit.

Jens Kristian Therkelsen
Siumut

[OQAASEQAATIP IMAA]

[Oqaaseqartoq, Siumut]